

然燈行道禮謝七世之愆痾耳為我來生作  
橋梁者也我病之困將以命盡壽終醫藥可  
救狂癲耳當如我命何哉爾時太上遙觀十  
方善惡之人即勅司命延此人壽三十年於  
是豁然而愈身康便如未病之時兼尚將展  
精進日新修齋持誠奉行眾善供養三寶致  
世世富貴善人來生其家轉輪得道是人今  
為太上東華仙王也積善之教民豈不然哉  
豈不然哉

○大上洞玄靈寶本行宿緣經終

太上洞玄靈寶本行因緣經

吳赤烏三年歲在庚申正月一日壬子仙公  
登勞盛山靜齋念道是日中時有地仙道士  
三十三人詣座燒香禮經旋行甫畢仙公命  
坐良久道士於是避席請問曰下官等學道  
彌齡積稔于今六百甲子矣而尚散跡於山  
林間師尊始學道幸早被錫為太極左仙公  
登玉京入金闕禮无上座皇不審夙自作何  
功德爰受天職致此巍巍三界壯觀所仰願  
為啓說宿命所由因緣根本也仙公曰子之  
所問遠乎微哉復坐吾將告爾夫一氣由虛  
无而生二儀由一氣而分清者為天濁者為  
地人受中氣而生與天地參為三才初无凡  
聖之異壽夭之殊混混沌沌不假修為而道  
自居既而混沌既鑿大朴既散人事錯錯而  
道違矣子輩前世學道受經少作善功唯欲  
度身不念度人唯自求道不念人得道不信  
大經弘遠之辭不務齋戒不尊三洞法師好  
樂小乘故得地仙之道然亦出處由意去來  
自在長生不死但未得起凌三界遊乎十方

仰瞻太上玉京金闕耳子欲使法輪速昇飛  
行上清諸天者當更立功救度國土民人災  
厄疾苦大功德滿太上錫迎子矣是以彭祖  
八百歲安期生千年白石生三千齡故遊民  
間皆坐其前世學法小功德薄故也乃有萬  
餘歲在山河中猶未昇天子但數百歲何足  
為久耶夫仙人寄於山林行陰德而昇仙及  
尸解託形者多顯迹於世國人所稱名書經  
傳者少矣時仙人有姓紀字法成仙公相之  
曰彼即我前世弟子也其未見宿命之根耳  
吾能令汝見前世時事也法成曰唯唯天尊  
須臾乃悟又手作禮弟子聞塞未識本行願  
無慙矣仙公曰昔帝堯之世汝隨我入嵩高  
山學汝志小望遠每譏吾虛誕所期遠遠所  
行難行復笑許由巢父絕尚箕山能辭堯禪  
交者之誨亦所未安常勸法成學上清道其  
於不從雖歛海不得滿腹徒叩石不獲玉菓  
許早昇太極宮吾今又方登左仙公之任汝  
獨為地仙但不死而已其德交集階子豈不  
悒悒乎於今乃知我言之有徵信而不欺矣

法成慙悅憶此未久心中了然昔不奉教此難可得願見拔度侍給雲車執御親封天顏故是弟子宿緣之會矣仙公曰汝超卓高舉裁可昇天而已那得隨我之太極宮朝太上玉京金闕乎吾无所惜矣仙人又請問仙公曰宿世本行爲盡是耶未竟者願教之仙公曰我先世經歷施行罪福輪轉化形經天說之亦當不盡子欲知之爲可略舉一隅耳吾昔嘗生爲貴人而凌貧賤扶彊抑弱死入地獄後生爲小人貧窮陋疾孤寒然時乃發念我宿命何行而致此辛苦彼宿命何德而享其富貴思念作善然心不自解憂毒難言死昇福堂後生富家珍寶內足无有所之而苦酷奴婢死入地獄徒考三官罪竟後生爲下使視人氣息伏事自效動得鞭笞勤苦塗炭靡所不履時乃發念先世何辜當作此下使耶而以私產供給貧人敬仰道士上香奉油惟願生貴家死昇福堂衣食自然後生爲貴人乃復殺害衆生漁獵爲事死入地獄經履刀山劔樹湯煮吞火五苦備至罪竟後生

爲猪羊以報昔怨後受形爲下賤人具惡可憎之極欺取人財而不還死入地獄後生爲牛以力償人以肉飮人後受形作中人珍寶近足是時乃念作功德常供養道士奉經奉戒謙謙下人布施厄困每事從道聞善欲從年八十乃死遷昇福舍衣食天厨後生貴家乃習好武勇殺伐爲事然故敬順道士信向正法死入地獄當經考毒時太上有教此人雖犯殺伐而已經入地獄在世信法敬道布施厄困今原其考罰可令昇福堂給以天厨後生爲貴人怨對將至是時發願念道敬受經教施行陰德拯濟危急政事以道慈心於物供養道士奉君以忠使臣以禮怕念辭榮棄祿乃免怨家壽終昇天堂生復爲貴人敬信尤精而少之時乃發念燒香願我後生智慧精明玄解妙義死昇福堂後生中士家遂爲道士被服法衣而行道時經講聰明動爲法師衆人所推檀越所敬時乃發念云此一生不能得道而不如女人惜寂无事可致開樂命終即生爲女人姿容端正才思玄拔發

言成章時乃修齋讀經於是發念爲男子才略宏落通玄徹虛洞解希微而願爲國王與道士周旋在意所願遊看山水妓樂內民常有經講命過昇天堂衣食自然尋生國王家爲太子從容儲官承統王業時快引道士賢儒學人行禮講道修齋寂靜肆意所尚國安民豐肅然无事是時三侍臣同發願後生作道士我爲隱士釋道微三法蘭願爲沙門鄭思遠張泰爲道士善志昇仙度世絕王務死遷昇天堂衣食天厨我後生爲隱士蘭微爲沙門張鄭爲道士俱入學道求仙吾後爲諸人作師志大乘行常齋誠讀經並齋珍寶詣大法師受三洞大經供養禮願齋誠行道服食吐納因緣未盡命過太陰即生賢家復爲道士沙門復得同學相爲師徒復受大經齋戒行道是故上聖矚目觀真降教於我也爾時蘭微張鄭盡侍座今日相隨是宿世之緣願故爾諸仙莫不釋然四座咨嗟乃嘆曰天尊上人求道積久彌劫歷稔故以得仙公之位諒有由矣我等今盡見宿世所行功薄受

經少那責求高仙乎於此當念更受大洞經  
慕道勤行慈心度諸困厄以冀昇天之道矣  
仙公曰子不尊上道洞經衆妙元理各自念  
勤大作功德度諸苦厄如是之志何憂不速  
昇天乎但便欲登太上金闕猶當未有日耳  
仙公曰我无所不履非筆札所載勤苦難說  
矣始蒙令報也仙人問曰前與上人俱入洞  
庭看天王別宮初登苞山時見有一輩仙人  
求隨上人看戲盡何等仙人乃多如此答曰  
彼仙人皆是諸名山洞臺仙人其已不多子  
不見崑崙蓬萊鍾山嵩高須彌人鳥諸大山  
洞室仙人無數矣仙人曰不知洞庭通何處  
答曰乃通此上諸大山及巨海吐靈谷宗五  
嶽无所不通矣有五仙人言歸向曲山彼上  
人鄉里乎答曰向曲山乃吾舉眼所見亦江  
左之佳山是九泉洞庭西掖門其下洞臺方  
四十里宮室煥日乃三十六小天之數也不  
受穢惡道士正可棲庇之耳常有聖人昔茅  
先生得道今故在彼山洞宮山上虛中名為  
空洞立玄宮觀舍仙人也

仙人請問曰近登崑崙玄圃宮侍座見正一  
真人三天法師張道陵降座都伺迎三界  
稽首諸天禮問動靜龍駕曜虛頂負圓明身  
生天光文章煥爛先世何功德故是得道其  
獨如是乎願聞之答曰天師本行所歷亦彌  
劫勤苦齋戒請經弘道大度高範玄真耽味  
希微轉輪求道尤過於吾不可具其志大經  
行大道故得三天法師之任太上正一真人  
之號矣豈不大乎時東華青童子象仙盡嵩  
高洞中靜齋誦經如學之者聞仙公說諸本  
行莫不思念大法以自篤勵青童曰仙公妙  
唱辭速事專信而可尊者也衆仙作禮而曰  
請事斯語矣青童曰吾前與卿書獲報承春  
至恒不曾忘足下受太上錫吾乃應先有修  
敬情好相親未即展其每為反側願不負此  
懷也仙公曰前辱卿書慰春殊過深為踰踏  
益用虛佇情何已乎不以短乏德忝上聖  
顯微書命赫奕愧所不勝相與道德周旋三  
界每念逍遙同遊敬虛斯情可言公家之敬  
莫復及也但尋登上任遠遠日近逆有戀恨

如何青童答曰銜願至願數有恩慰耳仙公  
曰天師言月旦十五日能齋於靜室讀所受  
道經及諸仙道迹者皆當為後聖之民生值  
斯世豈不樂乎丁卯日禮東華青童君於靖  
中灶向三拜求所願神仙之事又本命日讀  
經不交人事皆是求仙之要言也道家此事  
亦多矣適人所奉者也大歸訣在丹情行玄  
教有願无不剋也

太上洞玄靈寶本行因緣經